

15.6.2021_Berita Harian_YB Khairy Jamaluddin - Kes positif 7 hari turun 20 peratus

2

Nasional

Selasa, 15 Jun 2021

Penularan COVID-19

Kes positif 7 hari turun 20 peratus

KKM rekod 905 kes purata dirawat di ICU

Oleh Rafidah Mat Ruzki dan Luqman Ariff Abdul Karim
bmnews@bhm.com.my

Putrajaya: Kementerian Kesihatan (KKM) merekodkan penurunan kira-kira 20 peratus kes positif COVID-19 sepanjang tujuh hari berakhir Sabtu lalu, berbanding minggu sebelumnya.

Menteri Kesihatan, Datuk Seri Dr Adham Baba, berkata sebanyak 41,630 kes positif baharu dilaporkan sepanjang tempoh itu atau dirujuk sebagai minggu epidik ke-22, manakala purata kes aktif pula sebanyak 81,461 berbanding minggu sebelumnya, iaitu pengurangan 0.6 peratus.

"Pengurangan kes ini dikesan bermula minggu epidik ke-21. Jumlah kematian pada minggu epidik ke-22 pula sebanyak 553 kes, iaitu pengurangan sebanyak 13.7 peratus berbanding minggu epidik ke-21.

"KKM juga merekodkan 905 kes purata yang dirawat di unit rawatan rapi (ICU), meningkat 3.9 peratus berbanding minggu

sebelumnya," katanya pada sidang media Badan Bertindak Imunisasi COVID-19 (CITF) bersama Menteri Sains, Teknologi dan Inovasi, Khairy Jamaluddin, secara maya, semalam.

Katanya, purata kes yang memerlukan alat bantuan pernafasan juga meningkat 4.1 peratus atau 454 daripada kes yang dirawat di ICU setakat 12 Jun lalu, manakala penggunaan katil hospital untuk rawatan pesakit COVID-19 meningkat enam peratus iaitu sebanyak 11,542 digumakan di 101 hospital.

Setakat 12 Jun lalu juga, beliau mengemukakan, sebanyak 572,113 kes sudah sembuh sepenuhnya, iaitu 87.7 peratus daripada jumlah keseluruhan kes jangkitan COVID-19 di negara ini.

Sementara itu, Dr Adham berkata, sebanyak 629,894 ujian COVID-19 dilakukan sepanjang minggu epidik ke-23 berbanding minggu sebelumnya, berkurangan sebanyak 11.7 peratus.

Mengenal kluster pula, beliau menjelaskan, sebanyak 2,462 kluster direkodkan setakat 12 Jun dengan 761 masih aktif dan sepanjang minggu epidik ke-23, 154 kluster baharu dikesan dengan 107 atau 69.5 peratus adalah kluster berkaitan tempat kerja.

"Dalam tempoh 13 Mei hingga 10 Jun 2021, sebanyak 60 kluster

berkaitan perayaan direkodkan, iaitu sebanyak 58 berkaitan Aidilfitri dan dua berkaitan Hari Gawai," katanya.

Dalam perkembangan berkaitan, Dr Adham berkata, bilangan pesakit COVID-19 kategori 4 dan 5 yang diperolehi daripada Pusat Kesiapsiagaan dan Tindak Cepat Krisis Kebangsaan (CPRC) perkhidmatan hospital di seluruh negara menunjukkan trend peningkatan bermula April lalu.

Katanya, peningkatan itu adalah daripada 6,751 kes pada April kepada 30,287 kes pada Mei dan dijangka terus meningkat bulan ini memandangkan setakat kini, terdapat 22,857 kes direkodkan di seluruh negara.

Pesakit kategori 4 adalah mereka yang memerlukan oksigen, manakala kategori 5 adalah pesakit yang memerlukan bantuan pernafasan.

Berikutan situasi itu, beliau berkata, kapasiti penggunaan katil di ICU kini mencapai 97 peratus daripada keseluruhan 1,767 katil ICU di seluruh negara, termasuk di hospital kerajaan dan hospital Angkatan Tentera Malaysia (ATM).

Sementara itu, Dr Adham berkata, kerajaan menetapkan klinik dan pusat perubatan swasta menyediakan bil terperinci bagi penjujukan perkhidmatan ujian



Dr Adham bersama Khairy pada sidang media Badan Bertindak Imunisasi COVID-19 di Putrajaya, semalam. (Foto BERNAMA)

COVID-19 sekiranya kos dikenakan melebihi harga siling setiap jenis ujian seperti ditetapkan KKM.

Harga siling ditetapkan bagi ujian saringan Tindak Balas Berantai Polimerase (RT-PCR) pada RM150, 'rapid molecular' yang membolehkan ujian diperolehi dengan pantas pada RM270, Kit Ujian Pantas (RTK) Antigen pada RM60 dan ujian pantas mengesan antibodi pada RM50 di Semenanjung.

Di Sabah dan Sarawak pula, harga siling RT-PCR ditetapkan RM200, RM350 bagi ujian 'rapid molecular', RM80 bagi RTK Antigen dan RM70 bagi ujian pantas antibodi.

"Orang ramai boleh membuat aduan kepada CPRC dan Cawangan Kawalan Amalan Perubatan Swasta (CKAPS) sekiranya klinik atau pusat perubatan swasta mengenakan harga tidak

berpatutan untuk ujian saringan COVID-19," katanya.

Beliau juga mengemukakan, penyertaan pengamal perubatan swasta masih dibuka khususnya untuk berkhidmat di pusat saringan COVID-19 dan PPV mengikut lokaliti berhampiran di seluruh negara, selaras pendekatan *whole of government, whole of society*.

"Ia diharap akan mempercepat lagi usaha kerajaan untuk memastikan pencapaian status imuniti kelompok dan seterusnya berjaya melandaikan keluk penularan pandemik COVID-19 di negara ini," katanya.

Katanya, pendaftaran boleh dibuat dengan melayari portal KKM di <http://www.moh.gov.my> - Iklan Pembelian Perkhidmatan Doktor Pakar Swasta dan Doktor Swasta Secara Kontrak Dalam Tempoh Penularan Wabak COVID-19.